

Supervizorova novogodišnja poruka: Brčko napreduje, ali je u 2024. godini potrebno poduzeti dodatne napore



Prvi zamjenik visokog predstavnika i supervizor za Brčko Distrikt Jonathan Mennuti svim građanima Brčkog upućuje svoje najiskrenije želje za uspješnu 2024. godinu.

Supervizor upućuje pohvale Vladi za rezultate koji su postignuti tokom protekle godine, uprkos političkim turbulencijama, generalnim štrajkovima, pošasti svinjske gripe i drugim preprekama.

Supervizor koristi ovu priliku da se osvrne na iskorake koje je Brčko napravilo u protekloj godini i na važne zadatke koji predstoje u 2024. godini.

Uprkos povremenom političkom reorganiziranju vlasti i sporadičnim kašnjenjima, Brčko Distrikt je tokom prethodnih 12 mjeseci nastavio s provođenjem reformi usmjerenih na poticanje propisnog rada struktura vlasti, unapređenje razvoja infrastrukture, jačanje fiskalne discipline i energetske sigurnosti. Distrikt je model mirne koegzistencije i saradnje.

Izgradnjom spomenika kojim se odaje počast civilnim žrtvama rata u februaru je okončana realizacija sporazuma iz 2009. godine. Osim podsjećanja na stradale žrtve rata, ovaj spomenik

je i trajni simbol nepokolebljive opredijeljenosti Brčko Distrikta za zajedničku, mirnu i prosperitetnu budućnost.

U julu su usvojene zakonske izmjene koje omogućavaju bolju raspodjelu budžetskih sredstava za kapitalne projekte, infrastrukturu i unapređenje javnih usluga. S obzirom da su usvojeni potrebni planovi, uskoro će započeti izgradnja novog centralnog transportnog cjevovoda čime će se poboljšati vodosnabdijevanje na cijelom području Distrikta.

Aktivnosti deminiranja nastavljaju se odvijati predviđenim tempom, što će omogućiti da do kraja 2024. godine cijela teritorija Brčko Distrikta bude deminirana. Supervizor poziva organe vlasti da nastave pružati podršku timovima za deminiranje i njihovim partnerima kako bi došlo do pune realizacije ovog izuzetno važnog cilja.

Nastavlja se modernizacija jedine riječne luke u BiH, a na horizontu Brčkog vidimo novu dizalicu. Ovaj projekat ukazuje da predstoji period obimnijeg trgovinskog poslovanja, više trgovine i prosperiteta za Brčko i cijelu BiH. Pravovremeni završetak projekta poboljšanja snabdijevanja Luke električnom energijom dodatno naglašava postignuti napredak.

Za spriječavanje daljnjih kašnjenja u odvijanju ovog infrastrukturnog projekta koji ima suštinski značaj, neophodno je osigurati poduzimanje ubrzanih napora na okončanju postavljanja dizalice, te na izgradnji novih putnih i željezničkih pristupnih tačaka, kao i na brzom izdavanju preostalih dozvola.

Brčko također treba osigurati neometanu saradnju sa organima vlasti BiH i Republike Hrvatske u cilju ponovnog korištenja mosta Brčko-Gunja za odvijanje teretnog saobraćaja u punom kapacitetu.

Brz angažman svih relevantnih tijela je od ključnog značaja za okončanje procesa usvajanja novog prostornog plana, koji je osnovna smjernica za finalizaciju trase nove mreže autoputeva

i priprema za izgradnju novog centra za upravljanje otpadom. Organi vlasti također trebaju ubrzati pripreme za početak realizacije pet vitalnih infrastrukturnih projekata planiranih u saradnji sa Svjetskom bankom, kako bi poboljšali kapacitete u oblasti zaštite okoliša i zaštite od poplava.

Provedba neophodnih podzakonskih akata je od presudne važnosti kako bi Brčko moglo u potpunosti iskoristiti novo energetske zakonodavstvo. Uz to, prioriteti su i opredijeljenost za reformu javne uprave i borbu protiv korupcije, uključujući i jačanje kapaciteta i transparentnosti organa za provođenje zakona i antikorupcijskih tijela.

Supervizor još jednom ističe da, iako političke rasprave imaju suštinski značaj za demokratske procese, one ipak ne smiju negativno utjecati na postizanje konkretnog napretka ili ugrožavati odvijanje ključnih reformi i projekata. Politički lideri Brčko Distrikta, bez obzira na njihovu stranačku pripadnost, trebaju dati prioritet provođenju vlasti, a ne politikantstvu.

Međunarodna zajednica je spremna na svaki mogući način pomoći Brčkom, bez favoriziranja bilo koje političke opcije. Supervizor poručuje svim političarima Brčko Distrikta da je neophodno imati stabilan i funkcionalan Distrikt kako bi se ispunile obaveze definirane Konačnom odlukom, što je obaveza svih političkih stranaka u Brčkom, bez obzira da li su dio vladajuće većine ili su u opoziciji.

Predstojeća 2024. godina će biti godina izazova. Izuzetno je važno da se brzo djeluje u prvom dijelu godine, prije sezone godišnjih odmora, jer će druga polovina godine biti okrenuta ka izborima i procesu formiranja vlasti koji će uslijediti nakon izbora. Ove aktivnosti zahtijevat će opredijeljenost i napore svih političara Brčko Distrikta. Realizacija reformi usmjerenih ka budućnosti i poboljšanje životnog standarda stanovnika Distrikta je sveobuhvatni cilj za sve političke subjekte u Brčkom.

